



**NDIMENI**  
**MWAMI**  
**NGWAKOZYA KUFWIDA**

Akalembwa a Watson Goodman

Takasambalwi Nkakupa Buyo

## **INO NDIMENI?**

**Mulengi wesu ulizyi kuti ndiswebani alimwi cilambilizigwa, mujwi lyakwe nkotukozya kuzyiba mulengi wesu, nkotuya kumbele alimwi mbotukozyakuba akutambula Leza mukutufutula.**

**Bamwi tabazyi Leza mbafutula. Bamwi bazyi asyonto pele bayelede kuyandaulisya. Bamwi balalwana kufutulwa a-Leza, kakuli bamwi bakumbata Kulincico Kuyandisya Alimwi mukufulwa baba a-Jesu Kristo, basumpuka kutamani.**

**Moyo wamgu ulakozya kuba kufumbwa mbweyanda Kuti mulengi acite lwakwe. Ndakozya kumukaka alimwi kuya kubumi bwamapenzi atamani, na Kumutambula alimwi akusyomeka akulemeka akumulekela kuti twabane bwinga bwakwe a cuuno ca-nyika yakwe kukabeku kutamani. —Watson Goodman (1920-2002)**

# MUZEZO MUPATI LEZA NGWAKA LENGELA MUNTU 1

*Uyoba Nabwinga Utamani*

**Isaya 62:5b**

...Mbubonya mbuli sibwiinga mbwakondelwa nabwiinga wakwe, a-Leza wako uyookondelwa nduwe.

Lino Bwami bwakujulu buzokozyanisigwa abasimbi bali ikumi ibakabweza malampi aabo kuti baye kuyoozinga simusa. . . . Nkabela akati kamasiku kwakamwigiwa loongololo lwakuti, Amulange, ngooyu simusa! amuzwe mukamucinge. — Matayo 25:1, 6

*Kristo Ngosibwinga Utamani*

**Johane 3:29a**

Uujisi bwiinga ngusibwiinga, pele mweenzinyina sibwiinga,

uuima akumuswiilila, ulabotelwa kwiindilila nkaambo kajwi lyasibwiinga. . .

**2 Ba-Korinto 11:2**

Nkaambo ndamufwida bufwi-bufwi bwa-Leza, ikuti ndakamweebela mwaalumi omwe, kuti nkamutole kuli-Kristo mbuli musimbi uusalala utanakwetwe umbi.

**Matayo 9:15**

Nkabela Jesu wakabaambila kuti, Sa beenzinyina simusa balakonzya kulila, simusa naacili abo? Azoosika mazuba nibazonyangwa simusa, elyo bazooli-mya kulya.

## 2 NKAKAAMBO KAKO LEZA NCAKALENGELA MUNTU MUCINKOZYA CAKWE

*Takwe Cibulide Mulinguwe Kuti  
Abe nabwinga Wakwe  
Matalikilo 1:27*

Nkabela Leza wakalenga muntu mucinkozya cakwe. Wakamulenga mucinkozya caLeza. Wakabalenga baalumi abanakazi.

**Ba-Efeso 1:4**

Mbubonya mbuli mbwaakatusala mulinguwe kuzwa kumatalikilo aanyika, kuti tusalale, tuta bi akampenda nikaba komwe kumeso aakwe.

*Ulizumizidwe Kutola Lubazu  
Muli Leza*

... kuti mulinzizyo mube aca-abilo cabu-Leza akuvunwa kubu-

sofwaazi bwaansi ano buzwa kuzisusi zibi — 2 Petro 1:4b . . . ndi mwaabilwanyoko mubulemu buyooyubununwa. — 1 Petro 5:1b . . . Eci cakaboneka nkaambo ka-Makani Mabotu. — Ba-Efeso 3:6b . . . nkaambo abo mbobabele-kela milimo mbasyomi, alimwi mbayandwa. — 1 Timoteo 6:2b Nkaambo kakuti twaba beenzi-nyina Kristo . . . — Ba-Hebrayo 3:14a . . . abakali kusangandizi-dwe kale ku-Muuya Uusalala. — Ba-Hebrayo 6:4b . . . anu walo utukomena kuti tululame, tukaa-bilwe busalali bwakwe. — Ba-Hebrayo 12:10b

**Matalikilo 9:6b**

. . . nkaambo muntu wakalengwa mucinkozya ca-Leza

**Incito 17:24a, 25b, 26a, 27-29a**

Leza uwakalenga nyika azintu zyoonse izili mumo . . . nkaambo ngonguwe mwini nguubapa boonse buumi, amuuya, azintu zyoonse. Wakaacita masi oonse aabantu kukulengwa komwe, kuti akale munyika yoonse. . . Kayanda kuti bamuyandaule Leza, kuti kukumwaampasya ambweni balamujana, nokubaboobo tali kule kulumwi umwi wesu. Nkaambo mulinguwe motupona, motuputa, motubede, mbubonya mbobakaa-  
mba bamwi balembi banu kuti,

Aswebo tuli bana bakwe. Eno mbotuli bana ba-Leza . . .

*Adamu Wakalengwa Mucinkozya  
Ca-Leza Wakalijisi Kukomana,  
Mbubonya Mbuli Leza*

**1 Bami 8:11**

Mane bapaizi bakakacilwa kwiimikila kubeleka nkaambo kajoba, nkaambo bulemu bwa-Jehova bwakazuzya iganda ya-Jehova.

**Matayo 17:1a, 2**

Jesu . . . Nkabela wakasanduka kubusyu bwabo. Busyu bwakwe bwakabala mbuli izuba, azyakusama zyakwe zyakatuba buu mbuli mumuni.

## 4 KUZWA KUBUSWEYI KUYAKUCIBI

*Wakalengwa Mbuli Leza Usweya*  
Nkaambo kakuti kulilembedwe kuti, Amusalale, nkaambo ndasalala mebo. — 1 Petro 1:16

*Kutalemeka Kwakacita*  
*Kwaandana*

Nkaambo mbuli kukutaswiilila kwamuntu omwe banji bakaba basizibi, mbubonya obo kuku-swiilila kwamuntu omwe banji balaba baluleme. — Ba-Roma 5:19

Ba-Roma 3:23

Nkaambo boonse babisya akulela kubulemu bwa-Leza.

*Mukucengwa Alimwi Acibi*  
Jeremiya 17:9

Moyo wamuntu uleena kwinda zintu zyoonse, ulijisi bulwa-

zi bukaka kupona, taakwe uukonzya kuzibisya mbuubede.

Matalikilo 6:5

Lino Jehova wakabona kuti bubi bwa bantu baansi bulayoo-sya, amiyeeyo yoonse bantu njibayeeya mummyoyo yabo mibi luzutu mazuba oonse.

*Leza Ulabakaka Basizibi*  
Luka 13:27b

...Ndamwaambila, nsimuzi nkomuzwa, amuzwe kulindime nywebo nyoonse nomucitazibi.

Johane 3:19

Eno oku nkubetekwa, kuti mumuni wasika ansi, pele bantu bayanda mudima kwiinda mumuni, nkaambo milimo yabo mibi.

## INO TUJISI BWENZINYINANZI A-LEZA?

5

*Nyama Itasalali*

Isaya 64:6

Toonse twaba mbuli uusofweede. Incito zyesu ziluleme zyoonse zyaba mbuli cisani cisofweede cinunka nsu. Toonse tulapusama mbuli matu, amilandu yesu ilatutola mbuli muuwo.

*Ndilamulandu*

Ba-Roma 5:18a

Mbubo, mbuli kulusotoko lwamuntu omwe kwakazida bantu boonse mulandu. . .

*Lufu Lutamani Luli Alindime*

Ba-Roma 5:12

Mbuboobo cibi mbucakanjila munyika kumaanza aamuntu omwe buyo, alwalo lufu nkaambo

kacibi, nkabela mbubonya obo lufu mbulwakazida bantu boonse, nkaambo kakuti boonse babisya.

*Cibi Cindicitide Buzike*

Pele ndabona mulao umbi muzizo zyangu, uulwisya mulao wamoyo wangu, nkabela ndaba mwaange wamulao wazibi uuli muzizo zyangu. — Ba-Roma 7:23

*Cibi Cilandanya Kuzwakuli Leza*

Isaya 59:2a

Pele milandu yanu njeyamwandaanya a-Leza wanu. . .

*Ndiyo Lyambilila Kumbele*

*Lya Leza*

Aboobo, toonse buyo tuleelede kulyaambilila makani esu kubusyu bwa-Leza. — Ba-Roma 14:12

*Mumubili Uswekede Ndili Buyo  
Mbuli Bulonga, Nabwizu Nacintu  
Cimwaka Buyo*

**Isaya 64:8**

Pele nduwe tateesu, O Jehova. Ndiswe bulongo, nduwe mubumbi wesu. Toonse tuli zilenge zyamaanza aako.

**1 Petro 1:24**

Nkaambo kakuti Nyama yoonse ilikozyene amani. Bulemu bwayo boonse bulikozyene amalagalanga aamusokwe. Mani alayuminina, aalo malagalanga alakunkumuka.

**Jakoba 4:14**

Anukuti tamucizi ciyooba junza Ino buumi bwanu ninzi? Ni-

ngubi buyo iibonwa kaindi kaniini, ndilyonya yamana.

*Ndilakozya Kuba Abumi*

**Johane 11:26**

Naba uli buti muumi uusyoma ndime, takooyoofwa pe. Wazumina obo na?

**1 Johane 5:10, 11**

Oyo uuzuminina Mwana wa-Leza ulijisi bukamboni mulinguwe mwini. Oyo uutazuminina Leza wamucita mubeji, nkaambo tazuminini bukamboni obo Leza mbwaakatupa aa-Mwana wakwe. Lino bukamboni mboobu, bwakuti Leza wakatupa buumi butamani, obu buumi buli mu-Mwana wakwe.



**Intembauzyo 24:7-9**

Amusumpule mitwe yanu, nomilyango, Amusumpuke, nozite-ndeke zyoongoli, Kuti mwami wabulemu anjile. Ino ngwani mwami wabulemu? Ngu-Jehova singuzu, sintaze, Ngu-Jehova silumamba sintaze. Amusumpule mitwe yanu, nomilyango, Amusumpule, nozitendeke zyoongoli, Kuti mwami wabulemu anjile.

**1 Timoteo 6:14b, 15b, 16**

. . . mane do kubuzuba mbwayoopompa Mwami wesu Jesu Kristo . . . nkaambo uyookuleta Singuzu utembaulika, uuiide alike, Mwami wabami, Mweendelezi wabeendelezi, uupona amu-

yamyaaka, uukede mumumuni uutavulwa afwaafwi, uutanabwene nokuba kukonzeka kubonwa kumuntu. Abe abulemu anguzu zitamani. Amen.

*Mwami Oyu Uyoba Mwami  
Wanyika Yoonse*

Nkabela mubuzuba obo kuyookunka maanzi maumi kuzwa ku-Jerusalemu. Cisela cimwi cao ciyooya kulwizi lwakujwe, acisela cimwi ciyooya kulwizi lwakumbo Taakooyoyuminina pe, mainza acilimo. Nkabela Jehova uyooba mwami wanyika yoonse mubuzuba obo. Jehova uyooba omwe alike, azina lyakwe liyooba lyomwe. — Zekariya 14:8, 9

## **8 JESU KRISTO WAMBILIZYA BWAMI BWAKWE**

**Johane 18:36, 37**

Jesu wakavuwa kuti, Bwami bwangu tabuli bwaansi ano, bwami bwangu nobwali bwaansi ano, abazike bangu nobandilwanina, kuti entatolwa ba-Juda. Pe, bwami bwangu tabuli bwakokuno. Nkaambo kaako Pilato wakamwaambila kuti, Ena, uli Mwami na? Jesu wakavuwa kuti, Nduwe ooamba kuti ndi Mwami. Nce-ndakazyalilwa, ncendakasikila ansi ano, kuti nkalungulule bwini. Boonse banabwini banoomvwa ijwi lyangu.

**Marko 14:61, 62**

Pele walo wakaumuna buyo, akuvuwa pe. Alimwi mupaizi mu-

pati wakamubuzya kuti, Sa nduwe Kristo, mwana ayooyo uukombwa na? Lino Jesu wakati, Ndi-me, alimwi muyoobona Mwana a-Muntu ulikede kululyo lwasinguzu akuboola amakumbi aakujulu.

**Matayo 25:31, 34**

Lino Mwana a-Muntu naazooloola mubulemu bwakwe antoomwe abaangelo bakwe, uzookala acuuno cabulemu bwakwe... Lino mwami uzooambila abo bali kululyo lwakwe, kuti, Amuboole, inywe nomuyandwa kuli-Taata, amukone bwami mbumubambili-dwe kuzwa kumalengelo aanyika.

## **BWAMI BWA-JESU KRISTO MBOBUNOBEDE 9**

**Ba-Hebrayo 1:8**

Anu kwalo ku-Mwana waka-teeti, Cuuno cabupati bwako, Leza, ncalyoonse lyoonse, Akalo kasako kabwami bwako bupati nkasako kakululama kwini.

Lino sunu mebo nde-Nebukadinezara ndalemeka akutembaula akulumba Mwami wakujulu, nkaambo milimo yakwe yoonse njakasimpe, anzila zyakwe zili-luleme . . . — Daniele 4:37a

Wakati, Ncobeni ndamwaa- mbila kuti, Mwataakusanduka akuba mbuli twana, tamukooyoo- njila pe mu-Bwami bwakujulu. Nkaambo kaako umwi aumwi uulibombya mbuli kana aka ngu-

wenya uuzooba mupati mu-Bwami bwakujulu. — Matayo 18:3, 4

**Ciyubunuzyo 11:15b**

. . . Bwami bwaansi bwaba bwaMwami wesu abwa-Kristo wakwe, nkabela uyooendelezya lyoonse mane kukabe kutamani.

**Ba-Efeso 1:18, 19**

Kuti meso aamyoyo yanu abo- nesye, mumwisye mbuzibede zintu nzimulangila nzyaamwiitila, ambwaabede manjelenjele malemu aalukono ndwaatupa akati kabasalali, ambuzibede inguzu zyakwe impati loko ziinda nzyajisi kulindiswe, swebo nituzumina. Ezi inguzu zilabeleka muciyanza cigambya loko.

Mbubonya mbookamupa bwami kubantu boonse, kupa buumi ubutamani kulibaabo boonse mbookamupa. — Johane 17:2

1 Petro 3:22

Uukala kululyo Iwa-Leza, nkaambo wakainka kujulu, abaangelo abasibwami abasinguzu boonse balibikidwe kungsi lyakwe.

Ba-Efeso 1:20-23

Nziziyonya zyakalibonya muli-Jesu Kristo kuciindi eco ncaakamubusya kuzwa kubafu akumubika kujanza lyakwe lyalulyo mumyeenya yamujulu, kuti ainde loko boonse beendelezi abapati abasinguzu abami, akulemekwa kwiinda mazina oonse aambwa,

nikuba kuciindi ecino nikuba kuciindi ciciza. Wakabika zintu zyoonse kungsi lyamaulu aakwe, alimwi wakamubika kuti abe simutwe wazintu zyoonse kumbungano. Imbungano njiyonya ngumubili wakwe, mbobuzule bwayooyo uuzula zintu zyoonse

Pele Jesu taakali kulisyomena mbabo, nkaambo walibezi bantu boonse, akwalo kuti teeledede kuti aambwe bantu, nkaambo walo mwini walizi iziyali mumyoyo yabantu. — Johane 2:24, 25

Mebo ndibe mulimbabo, ayebo mulindime, kuti bazuzigwe kuba bamwi . . . — Johane 17:23a

# BUVUBI, NGUZU ALIMWI ABUSONGO BWAKWE TABWELEKWI

11

. . . Uelede Mwanambelele iwakajayigwa. Uelede kutambula bwami abuvubi abusongo, Anguzu alulemeko abulemu azilongezo. — Ciyubunuzyo 5:12b

Lino Jesu wakeza, wabaambila wati, Ndapegwa bwami boonse nibuba bwakujulu nibuba bwaa-nsi. — Matayo 28:18

## 1 Ba-Korinto 8:6

Nekubaboobo kulindiswe kuli Leza omwe buyo, Taateesu, nguzyazwida zintu zyoonse, ngutuponena aswebo. Alimwi kuli Mwami omwe Jesu Kristo, nguzyakalengesegwa zintu zyoonse, aswebo twakalengesegwa mulinguwe.

## 1 Ba-Korinto 1:24b

. . . ninguzu zya-Leza, alimwi mbusongo bwa-Leza.

## Ciyubunuzyo 11:17

Bakati, Twakulumba, O Mwami Leza Singuzuzyoonse, Uuliko, Iwakaliko, Uuyoobako, Nkaambo walibwezela inguzu zyako impati kuti uendelezye.

Ndayandisya kuti myoyo yabo isimizigwe, babe alukamantano lwakuyandana akuba alulamo luzwa kukumvwisya makani, bazi-bisye makani aasisidwe aa-Leza, nkukuti Kristo. Mulinguwe muzisisidwe imbono zyoonse zyamaanu azyaluzibo. — Ba-Kolose 2:2, 3

## 12 CIINDI CIBOOLA CA-MWAWI WALULANGALO

**Intembauzyo 72:8, 11**

**Bwami bwakwe butandabale kuzwa kulwizi kusikila kulwizinyina, Akuzwa kumulonga kusi-kila kumagolelo aanyika . . . Bami boonse bamukotamine, Misyobo yoonse Imumanine milimo.**

**Intembauzyo 2:2-4, 6-8**

**Bami baansi balalibamba, Abalo beendelezi balalayana, Kukulwisya Jehova amunanike wakwe. Bati, Atudunsule zyaanzyo zya-bo, Tusowe inkole zyabo kuzwa kulindiswe. Oyo uukede kujulu ulaseka. Mwami ulabawela . . . Waamba kuti, Ndime ndakazika mwami wangu Acilundu cisalala ca-Zioni. Ndaluula makani. Je-**

**hova wandaambila kuti, Nduwe mwanaangu, Ndime ndakuzyala mubuzuba obuno. Kumbila kulindime, elyo njookupa masi kuti abe lukono lwako, Amagolelo aanyika ukaavube.**

**Jeremiya 10:7, 10**

**Nguni uukonzya kukaka kuku-yoowa, O mwami wamasi oonse, nkaambo kuyoowegwa nciceelelo cako? Akati kabasongo babamasi amumami aabo oonse taakwe uuli mbuli nduwe. . . Pele Jehova ngu-Leza wakasimpe, Leza muumi, Mwami uuteeli. Nyika ilakankama kubukali bwakwe, amisyobo yabantu tiikonzyi kwii-ma nji naakalala.**

## LUTANGALO

Isaya 42:8

Ndime Jehova. Ndezina iyangungu. Bulemu bwangu nsikooyobupa umbi, akulemekwa kwangu nsikooyookupa zikozyano zifulidwe.

Matayo 24:30

Lino kuyoboneka citondezyo ca-Mwana a-Muntu kujulu, mpawo misyobo yoonse yaansi iyoolila, nkabela bayobona Mwana a-Muntu uuboola amayoba aakujulu anguzu abulemu bupati.

Ciyubunuzyo 4:11

Nduwe uelede, O Mwami, kutambula bulemu alulemeko anguzu, nkaambo nduwe wakalenga zintu zyoonse, nkaambo kabuka-

## LWA-MWAMI

13

nze bwako nkizibeda, ankiziyakalengelwa.

Intembauzyo 95:3

Nkaambo Jehova ngu-Leza mupati, Mwami mupati kwiinda mizimu yoonse.

1 Timoteo 1:17

Eno ku-Mwami mupati uutamani walyoonse, uutabonwa, Leza uuiide alike, akube bulemu akwaalaala lyoonse alyoonse kukabe kutamani. Amenii.

*Lutangalo Lwakwe Ulahwabanya  
Kuli Nabwina*

Johene 17:22

Abwalo bulemu mbookandipandabupa mbabo, kuti babe bamwi mbubonya mbotuli bamwi.

Isaya 9:7a

Bwami bwakwe buyookomene-sya, alwalo luumuno talukooyoo-mana . . .

Isaya 45:9a, 10-13a

Maawe kuliyooyo uukazyanya a-Mubumbi wakwe! . . . Maawe kuliyooyo uuambila wisi kuti, Ncinzi ncozyede? nanka kwaa- mbila mwanakazi kuti, Watu- mbukanzi? Mbuboobu mbwaa- mba Jehova, Uusalala wa-Israye- li, a-Mubumbi wakwe. Amundi- buzye makani aaciza. Amundi- lailile aabana bangu azilenge zya- maanza aangu. Ndime ndakaanza nyika akulenga muntu alinjiyo. Maanza aangu ngaakatandabika

ijulu, alimwi ndime ndakalailila makamu makamu aalyo. Ndime ndakamubusya mubululami, nka- bela njoolulamika inzila zyakwe zyoonse . . .

Daniele 7:14

Nkabela wakapegwa bweende- lezi abulemu abwami, kuti bantu bazisi zyoonse abamisyobo yoo- nse abamyaambo yoonse bamu- manine milimo. Bweendelezi bwakwe mbweendelezi butamani butakonzyi kweela, abwami bwa- kwe tabukonzyi kunyonyoonwa.

*Ulipede Ku-Nguzu Zyakwe*

Bami boonse bamukotamine, Misyobo yoonse imumanine mi- limo. — Intembauzyo 72:11



## MWAMI WALUTANGALO WAKAFWIDA NDIME 15

*Busena, Bwakambwa Alimwi  
Alufu Lwakwe Alimwi Kubuka  
Kwakwe*

**Matayo 20:18, 19**

Amulange! tulaya ku-Jerusalemu, nkabela Mwana a-Muntu uyooabwa kubapaizi bapati abalembi. Lino bayoomupa mulandu kuti ajayigwe, nkabela bayoomwaabila bamasi kuti bamunonge akumukwipaula akumubambula aciingano, lino mubuzuba bwatatu uyooabuka.

*Cibi Ncibi Kumeso A Leza  
Celede Kululamikwa*

Nkaambo kakuti alakwe Kristo wakafwida kale zibi, uululeme wakafwida bataluleme, kuti atu-

swenye kuli-Leza. Wakajayigwa kumubili, pele wakabusigwa kunguzu zya-Muuya.— 1 Petro 3:18

**Ba-Galatiya 1:3b, 4a**

. . . aku-Mwami Jesu Kristo. Walo wakalyaaba nkaambo kazi-bi zyesu kuti atusalulule kuzwa mububi bwaansi bwaciindi ecino.

**1 Johane 3:16a**

Lino luyando Iwa-Leza tulalubona boobu, nkaambo wakatutulila buumi bwakwe . . .

**1 Ba-Korinto 1:18**

Nkaambo kulibaabo bali mukunyonyooka makani aaciingano mbufubafuba buyo, anukuti kulindiswe nituli mukufutuka ninguzu zya-Leza.

## 16 BULOWA BUYANDIKA-MUFUTULI-UYANDIKA

**Ba-Efeso 2:13**

Pele sunu, mbuli mbumuli muli-Kristo Jesu, inywe nimwakali kule mulisweneszedwe afwiifwi nkaambo kabulowa bwa-Kristo.

**Ba-Hebrayo 10:19, 20a**

Nobeenzuma, eno buya mbotujisi kulitakata kwakunjila mu-Busena Busalala Bwini nkaambo kabulowa bwa-Jesu, kunzila impya iili abuumi njaakatusaangunina mucisitilizyo . . .

Alimwi wakabeleka kujanza lyakwe kukuliyanzanisizya zintu zyoonse . . . — **Ba-Kolose 1:20a**

. . . Amubone! Ndasitikizya mu-Zioni ibbwe lyakucizwi caganda, lisale, liyandisi. Nkabela uu-

musyoma takooyoousigwa bweeme. Lino obu buyandisi mbobwanu . . . **1 Petro 2:6b, 7a**

**Ciyubunuzyo 1:5b**

. . . Kulinguwe iwakatuyanda, akutusanzya kuzibi zyesu mubulowa bwakwe mwini.

**2 Timoteo 3:15**

Alimwi ulizi kuti kuzwa kucii-ndi niwakacili mwana ulyeezi magwalo aasalala aakonzya kukusongwaazya mukufutulwa kulusyomo luli muli-Kristo Jesu.

*Sibwinga Uyandaula Bwinga  
Bwakwe*

Nkaambo Mwana a-Muntu wakaboola kulangaula akufutula abasweekede. — **Luka 19:10**

**KRISTO WAKAZUNDA LUFU LWABILI ALIMWI 17  
KALAMBWE KAMULILA KAKANDIGWISYA  
KUZWA KULI MBABO**

*Ndakelede Kuba Alufu Lutamani*

Mbuboobo cibi mbucakanjila munyika kumaanza aamuntu omwe buyo, alwalo lufu nkaambo kacibi, nkabela mbubonya obo lufu mbulwakazida bantu boonse, nkaambo kakuti boonse babisya. — Ba-Roma 5:12

*Lufu Lwakazundilwa Ndime*

**2 Timoteo 1:9-10**

... zya-Leza, uwakatufutula aku-twiita akwiitwa kusalala. Takweensi kwaamba kuti twakaitwa nkaambo kamilimo njotwakacita, pe, twakaitwa nkaambo kabuka-

nze bwakwe mwini akaambo kaluzyalo lwakwe. Olo luzyalo twakalupegwa kalekale muli-Kristo Jesu, pele sunu lwalibonya mukupompa kwa-Mufutuli wesu Kristo Jesu, nguwenya wakazoolobya lufu akuyubulula buumi butafwiki kunguzu zya-Makani Mabotu.

**Ciyubunuzyo 1:18**

Ndime oyu uupona, nekuba-boobo ndakalifwide. Lino amubone, akupona ndapona lyaonse mane kukabe kutamani, nkabela ndijisi zijaluzyo zyalufu azya-Gehena.

**18 MWAMI WAKAPA LUFULUKO KULI BABO  
BOONSE BALUYANDAULA A-MOYO OMWE**

**1 Ba-Korinto 15:3b**

. . . Nkukuti kuti Kristo waka-  
fwa nkaambo kazibi zyesu, mbu-  
li mbwaamba Malembe.

**Incito 20:28b**

. . . mulele mbungano ya-  
Mwami njakaula abulowa bwa-  
kwe mwini.

**Johane 10:11**

Ndime sikweembela mubotu,  
sikweembela mubotu ulatulila  
mbelele buumi bwakwe.

**2 Ba-Korinto 5:15**

Nkabela wakabafwida boonse  
kuti abo bapona bataciliponene  
beni pele baponene oyo iwakaba-  
fwida akubuka.

**Incito 10:43**

Basinsimi boonse balasinizya  
anguwe kuti boonse abamusyoma  
balajatilwa zibi muzina lyakwe.

**2 Petro 3:9**

Jehova taamusya ngaakasyo-  
mezya kale, mbobayeeya bamwi  
kuti wamuka, pe, pele ucimuka-  
zikila moyo, nkaambo tayandi  
kuti bantu bafwidilile, ulayanda  
kuti boonse bajane ciindi cakwee-  
mpwa.

**Jeremiya 29:13**

Muyoondiyandaula nkabela  
muyoondijana, nkokuti na mwa-  
ndiyandaula camoyo woonse.

**Intembauzyo 45:6, 7a**

**Cuuno cako, O Leza, ncalyoo-nse; Kasako kabwami bwako nkasako kabululami. Ulayandi-sya bululami, ulisulide bubi. . .**

**1 Korinto 6:9a**

**Ma! Sa tamuzi kuti bataluleme tabakonzyi kuyoovuba Bwami bwaLeza? . . .**

**Ba-Roma 8:5-9**

**Nkaambo basinyama balayee-ya makani aanyama, anukuti ba-simuuya balayeeya makani aa-muuya. Ikuti miyeeyo yanyama ndufu, anukuti miyeeyo yamu-ya mbuumi, alimwi nduumuno. Nkaambo kakuti miyeeyo yanya-**

**ma ngusinkondonyina Leza, iku-ti tiilibombyi ku-Mulao wa-Leza nikuba kukonzya kulibombya. Basinyama tabakonzyi kubotezya Leza pe. Pele nywebo tamuli ba-sinyama, muli basimuuya, nku-kuti Muuya wa-Leza nuumukali-lide mukati. Umwi uutajisi Muu-ya wa-Kristo, oyu teensi wakwe pe.**

**Jakobo 4:4**

**Nywebo nobasimamambe, sa tamuzi kuti kutangana buzwala-ni anyika, nkokulwana a-Leza? Eno kufumbwa muntu uulisalila kuba muzwalani wanyika walicita sinkondonyina a-Leza.**

## 20 MBOKOZYA KUTAMBULWA KU-MWAMI

**Tusimpi 28:13**

Uusisa milandu yakwe takoo-yooba acoolwe pe, Pele oyo uu-lyaambawida akuleka ulafwidwa luzyalo.

**1 Johane 4:16**

Lino swebo twakaluziba aku-luzuminina luyando Leza ndwaa-katuyandisya. Leza nduyando, a-boobo oyo ukalilila muluyando ulakalilila muli-Leza, alakwe Leza ulakalilila muiinguwe.

**Johane 13:20b**

. . . awalo uunditambula wata-mbula oyo uwakandituma.

**Johane 1:12**

Ino boonse abamuzumina, nko-kuti abasyoma zina lyakwe, wa-

baabila nguzu zyakusanduka a-kuba bana ba-Leza.

**Incito 8:36, 37a**

Nobakali kweenda munzila, bakasika kwakali maanzi. Muzibe wakati, Ngaaya maanzi, ncinzi ino icindikasya kubapatizigwa? Filipino wateeti, Na wasyoma a-moyo wako woonse ulakonzya.

**1 Korinto 2:5**

Kuti lusyomo Iwanu kalutabi mubusongo bwabantu anukuti munguzu zya-Leza.

**Johane 8:31**

Eno Jesu wakabaambila ba-Juda abo abakamusyoma kuti, Mwajatisya majwi aangu, nco-beni mwaba basikwiiya bangu.

# LUFUTUKO LUPONA LUJISI BWENZINYINA 21

## ALIMWI ALUSWANGANO A-KRISTO

**Ba-Efeso 3:19**

Akuziba luyando Iwa-Kristo ilwiinda luzibo loonse, kuti muzule luzulo loonse Iwa-Leza.

**Ba-Roma 8:10**

Kuti Kristo ulimukalilide mukati, elyo mubili ulifwide nkaambo kazibi, anukuti muuya muumi nkaambo kabululami.

**2 Timoteo 1:12**

Ncencico eco ncempengela bobuya, nekubaboobo nsyuusi insoni, pe, nkaambo ndilimuzi oyo ngwensyoma, nkabela moyo wangu ulisinizize kuti walo ulakonzya kuyobola ncendabika mu-

maanza aakwe mane kusikila kubuzuba obo.

**Johane 10:26-28**

Pele nywebo tamusyomi, nkaambo tamuli mbelele zyangu Imbelele zyangu zilamvwa ijwi lyangu, ndilizizi, zilandicilila. Ndazipa buumi ubutamani, tazi-kooyoofwa limbi, takukwe uuyoozikwempa mujanza lyangu.

**1 Pero 4:19**

Eno abo bapenga caluyando Iwa-Leza kabaya bucita milimo mibotu akupa myuuya yabo mu- maanza aa-Leza Cilenga uusyomeka.

Nguni oyo uuzunda nyika cita oyo uuzumina kuti Jesu ngu-Mwana wa-Leza. —1 Johane 5:5

Kutaamba bana abakazyalwa kubantu, nokuba kukuyanda kwakuzyalana kwabuntu, nokuba kukuyanda kwamwaalumi, pele mbana abakazyalwa kuli-Leza.

— Johane 1:13

Alimwi muyooziba bwini, abwalo bwini buyoomunununa.

— Johane 8:32

Nkabela lino mulilubulwidwe kuzibi, mwaba bazike babululami. . .Pele sunu mbumulubukide kuzibi akuba bazike ba-Leza, mulijisi cilumbo canu cabusalazi, nkabela mamanino aaco mbuumi

butamani. — Ba-Roma 6:18,22

Mwami ngu-Muuya, nkabela koonse nkwabede Muuya wa-Mwami kuli bulubusi.

— 2 Korinto 3:17

Nkaambo kaako kuti Mwana wamunununa, ncobeni mulaba banunukide.

— Johane 8:36

Nkaambo kaako amuliyumye akujatisya obo bulubusi mbwaa-katulubula Kristo Mutanjili Iwabili mujoko lyabuzike.

— Ba-Galatiya 5:1

Nkaambo uyooba nduwe oomulungulula kubantu boonse, azezyo nzoobona akumvwa.

— Incito 22:15



**Ma! Sa tamuzi kuti bataluleme tabakonzyi kuyoovuba Bwami bwa-Leza? Mutalyeeni pe. Nibaba basibwaamu nibaba basikukumba mituni nibaba basimamambe nibaba batete kuzibi nibaba baalumi boona baaluminyina nibaba babbi nibaba basikulikumbuzya nibaba bakolwi nibaba basimatusi nibaba basilunyanzo tabanibaba basilunyanzo tabakooyovuba Bwami bwa-Leza. Lino mbuboobo mbubakabede kale bamwi akati kandinweye, pele sunu mulisanzizidwe, mulisalazizidwe, Mmulilulamikidwe muzina Iya-Mwami Jesu Kristo aku-Muuya wa-Leza wesu.— 1 Korinto 6:9-11**

**. . . Kulinguwe Iwakatuyanda, akutusanzya kuzibi zyesu mubulowa bwakwe mwini, akutubika kuba bami abapaizi kuli-Leza Wisi. . . — Ciyubunuzyo 1:5b, 6a**

**1 Korinto 6:2a**

**Sa tamuzi kuti basalali bazobeteka insi yoonse? . . .**

**Isaya 62:3**

**Lino uyooba musini wabweebesi mujanza Iya-Jehova, ingala yabwami mujanza Iya-Leza wako.**

*Mubusena Busumpukide*

**Johane 17:21a**

**Kuti boonse babe bamwi, mbuli nduwe Taata mboli mulindime, amebo mulinduwe, kuti abalo mbubonya babe mulindiswe. . .**

## 24 CAKACITWA MULUSWANGANO A-LEZA

**Intembauzyo 145:18**

Jehova uli kufwaafwi kuliboonse bamwiita, Boonse bamwiita calusinizyo.

**2 Ba-Korinto 6:16**

Intempele ya-Leza ilijisi makaninizi amituni? Nkaambo swebo tuli intempele ya-Leza muumi, mbuli mbwaamba Leza kuti, Nzookala akuya bweendeenda akati kabo, Nzooba Leza wabo, abalo bazooba bantu bangu.

Pe, nkaambo mwaba bapenzi nyina Kristo, aboobo muleelede kukondwa, kuti mukakondwe akusekelela kuciindi eco acalo nci-buyooyubununwa bulemu bwa-kwe. — 1 Petro 4:13

**1 Johane 1:3b**

. . . Ncobeni luswanaano lwesu luli a-taata a-Mwanaakwe Jesu Kristo.

**Isaya 43:2**

Ciindi noinda akati kamaanzi, njooba ayebo. Noinda akati kamilonga, tiikooyookutola. Noenda mukati kamulilo, tokooyopya pe, amabangabanga taakoo-yookutenta.

**Johane 17:23**

Mebo ndibe mulimbabo, ayebo mulindime, kuti bazuzigwe kuba bamwi, kuti inyika ikazibe kuti nduwe owakandituma, nduwe owakabayanda mbubonya mbookali kundiyanda amebo.

**BWENZINYINA BULI AKATI A-KRISTO  
ALIMWIABASYOMI BAKASIMPE**

**25**

**Johane 14:20**

**Elyo zuba muyooziba kuti ndili muli-Taata, anywebo muli mulindime, amebo ndili mulindinywe.**

*Inguzu, Zyakwe Intanzi  
Kokuyanda*

**Ciyubunuzyo 22:17a**

**Lino Muuya anabwiinga ba-laamba kuti, Boola. . .**

**Matayo 28:19, 20**

**Nkaambo kaako kamuya mukabaiisye bantu bamisyobo yoo nse, akubabapatizya muzina Iya-Taata alya-Mwana alya-Muuya Uusalala, alimwi amubaiisye kuti bajatisye makani oonsengenda-**

**kamulailila. Amulange, ndaba anywe mazuba oonse nikuba kusi-kila kumamanino aaciindi.**

*Bululami Bwaba Ciindi  
Mbobululami Bupona  
Muli Kristo*

**Ba-Kolose 1:27**

**Kulibaaba Leza wakayanda kuyubununa mbububede buvubi bulemu bwamakani aya akati kabamasi. Makani ngaaya aakuti Kristo uli mukati kanu, alimwi ngo-nguwe bulangizi bwabulemu.**

**Ba-Roma 10:4**

**Ikuti Kristo nguumanya Mulao, nguwe uuleta bululami kuli-boonse basyoma.**

## LUSE OLU, LUYANDO OLU ALIMWI LUZYALO OLU

Alumbwe Leza, Wisi wa-Mwami wesu Jesu Kristo! Nguwe wakatuzyalulula calweetelelo lwakwe lunji, kububuke bwa-Jesu Kristo kulufu, kuti tube abuumi bwabulangizi. — 1 Petro 1:3

Nkaambo kaako, atuswene cakatayoowa kucuuno caluzyalo, kuti tukatambule lweetelo akujana luzyalo lutugwasya muciiindi ncotubula. — Ba-Hebrayo 4:16

Pele Leza, Sibuyaya loko, nkaambo kaluyando lwakwe lupati, ndwaakatuyandisya, nekuba kuti twakalifwide mumilandu, wakatubusya toonse antoomwe a-Kristo (luzyalo ndomufutuzidwe).

Wakatusumpwida antoomwe anguwe akutukazika toonse muyeenya yamujulu muli-Kristo Jesu, kuti mumizukulu iiza azo-tondezye buvubi bugambya bwaluzyalo lwakwe mulweetelelo lwakwe ndwaaetelela ndiswe muli-Kristo Jesu. — Ba-Efeso 2:4-7

Eno mwamana kupenga kaindi, Leza siluzyalo loonse, uwakamwii ta mubulemu bwakwe butamani buli muli-Jesu Kristo ulamupa inguzu akumuzyatika akumubombomeka. — 1 Petro 5:10

Pele balalulamikwa buyo kuluzyalo lwakwe kubununu bwamuli-Jesu Kristo. — Ba-Roma 3:24

**Ba-Galatiya 4:4,5**

Pele nicakasika ciindi ceelede, Leza wakatuma Mwanaakwe, i-wakazyalwa kumwanakazi, wakazyalwa mu-Mulao, kuti akabanunune abo bakali mu-Mulao, kuti tukatambule bwana.

**1 Johane 3:1a**

Amubone mbulubede olo luyando lupati ndwaakatupa Taata lwakuti tubandwe kuti mbana ba-Leza, nkabela mbubonya obo mbutubede ncobeni . . .

*Kukona Kuli Leza*

**Ciyubunuzyo 21:7**

Oyo uuzunda uzookona zintu ezi zyoonse. Njooba Leza wakwe, alakwe uyooba mwanaangu.

**Ba-Galatiya 4:6,7**

Lino mbuli mbumuli bana, Leza wakatuma Muuya wa-Mwanaakwe mummyoyo yanu, uuompolola kuti, Abba Ta. Aboobo sunu tocili muzike, pe, uli mwana muzyala. Alimwi mbuli mboli mwana muzyale, ncobeni Leza wakucitya kuti ube swaana.

Lino kuti tuli bana, alimwi tuli baswaana, nkukuti baswaana ba-Leza, baswaana bakwe antoomwe a-Kristo . . . — Ba-Roma 8:17a

Nkabela mbuli mbumuli bakwe Kristo, muli inyungu zya-Abrahamu, aboobo muli baswaana mbubonya mbucaamba cisyomezyo. — Ba-Galatiya 3:29

## 28 LEZA WAKAYANDISYA KULI KOZYANIZYA MBULI BANA BAKWE

*Ba-Roma 8:28, 29*

Pele tulizi kuti kulibaabo bayanda Leza, nkukuti kulibaabo baitidwe mbuli bukanze bwakwe, ulabeleka abo kuti makani oonse abote. Nkaambo abo mbaakabwene kale wakabakanza kuti bakozyanisigwe mucikozyano ca-Mwanaakwe, akabe mutaanzi akati kababunyina banji.

*Yendela Muluyando Lwa-Kristo*

*Johane 15:9*

Mbubonya Taata mbwandiyanda, anywebo ndamuyanda mbubonya, kamukalilila muluyando lwangu.

*Futula Mbuli Kristo*

*Luka 22:27b*

. . . Kwalo mebo ndili akati kanu mbuli oyo uubelekela.

*Kojatila*

*Luka 23:34a*

Elyo Jesu wakaamba kuti, Taata, ubajatile, nkaambo tabezi nco-bacita . . .

*Amumwasye Mulumbe*

*Munyika Yoonse*

*Johane 20:21*

Nkabela Jesu wakabaambila alimwi kuti, Amube aluumuno, mbubonya mbwaakandituma Taata, amebo ndamutuma mbubonya.

## KWELELA KWANU AKUBE NKOKWENDA KWANU 29

1 Ba-Tesalonika 2:12

Kuti mweende munzila iielede kumeso aa-Leza iwakamwiitila bulemu bwakwe abwami bwakwe.

2 Johane 9

Umwi aumwi uusololela kumakani ambi akutakala mulwiiyo lwa-Kristo, tajisi Leza. Oyu ukala mulwiiyo ngonguwe ujisi Taata a-Mwana alakwe.

*Kristo Uyoba Anabwinga*

*Wakwe Utakandani Anguwe*

Ngusicoolwe oyo muntu uukatila mumasukusyo, nkaambo na wabonwa kuti muyumu, ulapegwa musini wabuumi, ngwaa-kasyomezya Mwami kulibaabo bamuyanda. — Jakobo 1:12

Luka 6:47, 48

Umwi umwi uza kulindime, aswiilile makani aangu, aacite, ndamutondezya oyo ngwakozya. Ulikozyene amuntu uwakayada ganda. Wakasya, mwiimbi walampa, wabika ntalisyo amwala. Elyo neyakasika miyoba, maanzi akauma ganda eyo, kwalo taakali enguzu zyakwiizunganya, nkaambo yakayakwa nga.

*Alimwi Ulayandisya Kuba*

*Anguwe*

Tito 2:13

Akulindila eco coolwe ncotulangila, nkokuti kupompa kwabulemu kwa-Leza wesu mupati, Mufutuli wesu Jesu Kristo.

Nkaambo kakuti luzyalo ndolumufutisizye nkaambo kalusyo-mo, nkabela makani taazwi kulindinywe nubeni, ncipo buyo ci-zwa kuli-Leza. Teensi makani aancito zyesu, pe, kuti kutabi muntu uulikankaizya. Nkaambo iswe tuli milimo yamaanza aakwe, twakalengelwa milimo mibotu muli-Kristo Jesu, njiyo njakabambide kale, kuti tweendele mulinjiyo. — Ba-Efeso 2:8-10

Ba-Efeso 3:20, 21

Lino kulinguwe uukonzya kucita loko mane akwiinda zyoonse nzitukumbila nanka nzituyeya, mbuli inguzu zibeleva mukati kesu, kulinguwe akube bulemu

mumbungano amuli-Jesu Kristo mumizukulu yoonse iiciza mane kukabe kutamani. Ameni.

*Uyolulamikwa Alimwi  
Akumaninina Muli Nguwe  
Ba-Efeso 4:13*

Mane do toonse tube abujatane bomwe bwabuzumini abwaluzibo lwa-Mwana a-Leza, tube abuntu bulondokede abwiime buzulide bwa-Kristo.

Ba-Kolose 2:9, 10

Nkaambo muli-Kristo mubukede bu-Leza boonse buzulide camubili, nkabela mulinguwe mumonya mumuzulizidwe inywe, alimwi ngonguwe simutwe waboonse basinguzu abasibwami.



*Nkaambonzi Ujisi Bangelo  
Batabaliki Cayanda Bakawa,  
Muzangi*

**Ba-Hebrayo 1:6**

Alimwi, alete buyo Mwanaa-  
kwe mutaanzi munyika, waamba  
kuti, Abalo baangelo boonse ba-  
Leza kabayoomukomba.

. . . Akuyandisya bana ba-A-  
damu. — Tusimpi 8:31b

**Ba-Roma 12:4, 5**

Nkaambo mbuli mbutujisi zi-  
zo zinji mumubili omwe, alimwi  
zizo zyoonse tazijisi mulimo o-  
mwe, mbubonya obo swebo, no-  
tuli banji, tuli mubili omwe mu-  
li-Kristo, toonse tuli zizonyina  
umwi aumwi mukwesu.

. . . nubakwesu, anywebo mwa-  
kafwida Mulao kumubili wa-  
Kristo, kuti mukabede umbi,  
nkukuti oyo iwakabusigwa kuzwa  
kubafu, kuti tukazyalile Leza  
micelo. — Ba-Roma 7:4b

*Bwinga Bujana Bumi Kuli Nguwe*  
**1 Johane 5:12**

Oyo uujisi Mwana ulijisi buu-  
mi, pele oyo uutajisi Mwana wa-  
Leza tajisi buumi, pe.

*Luyando Loonse Ndwapa*  
*Ku-Bwinga*

Oyo iwatakatukasya Mwanaa-  
kwe mwini, pele wakamwaabila  
ndiswe toonse, sa takooyootupa  
buyo antoomwe anguwe zintu zi-  
mwi zyoonse? — Ba-Roma 8:32

**Ciyubunuzyo 3:21**

Oyo uuzunda njoomuzumini-na kukala ambe acuuno cangu, mbubonya mbuli mbundakazunda ambebo, aboobo sunu ndike-de a-Taata acuuno cakwe.

*Munzi Wamwami Alimwi  
Abwinga*

**Ba-Hebrayo 11:16**

Pele bakalisukamine kuya kucisi cibotu ciinda, nkokuti kucisi cakujulu. Boobo, Leza taakwe naakausa insoni yakwaambwa kuti ngo-Leza wabo, nkaambo wakababambila kale munzi.

**Ciyubunuzyo 3:12a**

Oyo uuzunda njoomubika kuti abe musemu wamucikombelo

ca-Leza wangu, atakazwi limbi anze, nkabela njoolemba alingu-we izina lya-Leza wangu, azina lyamunzi wa-Leza wangu, ngu-Jerusalemu mupya, uuti seluke kuzwa kujulu kuli-Leza wangu.

**Ciyubunuzyo 21:2**

Nkabela ndakabona munzi mulemu, Jerusalemu mupya, uza buseluka kuzwa kujulu kwa-Leza, ulibambidwe mbuli nabwii-nga mbwalisakatizizya mulumi wakwe.

**Ciyubunuzyo 22:14**

Bali acoolwe abo basanzya zikobela zyabo, kuti bazumizigwe kuswenena kucisamu cabuumi akunjila mumilyango yamunzi.

Aboobo kuti tamsyomeki kulubono lwakutalulama, ino nguni uuti kamusyome kulubono lwini-lwini?  
— Luka 16:11

**2 Ba-Korinto 8:9**

Mulizi mbulubede luzyalo lwa-Mwami wesu Jesu Kristo, nkaambo walo wakali muvubi, neku-baboobo wakaba mucete nkaambo kandinywe, kuti bucete bwa-kwe bumuletele buvubi nywebo.

**Ciyubunuzyo 2:9a**

Ndizi mapenzi aako mbwaabede, abucete bwako (nekubaboobo uli muvubi) . . .

**Jakobo 2:5**

Sa Leza takabasalide baambwa kuti mbacete ansi ano, kuti baka-

be bavubi kulusyomo abaswaana babwami mbwaakasyomezya baabo bamuyanda?

***Cenjela Kubuvubi Bwansi*****1 Timoteo 6:17-19**

Kolailila boonse abo bavubide ecino ciindi, kuti batalinuniki nokuba kusyoma buvubi butasyomeki, pele kusyoma Leza uutufonkweda zintu zyoonse kuti katunga katuligwasya nzizyo. Kobalailila kuti bacite milimo iiluzi, kuti babe bavubi mukumana milimo mibotu, kuti kabafwamba kupa akwaabilana abeenzinyina. Kabaliyobweda intalisyo imbotu yaciindi ciza, kuti bajatisye buumi bwinibwini.

## 34 BWAMBANZI BWAMI BWAKASIMPE KULINDIME

Oyo uzoosandula mibili yesu iisampaukide, kuti ikozyanisigwe amubili wakwe mulemu. Eci ci-zooba nkaambo kanguzu zyayoo-yo uukonzya kumubombezezya zintu zyoonse. — Ba-Filipi 3:21

Amukalumbe Taatesu nkaambo wakatucita kuti tweelwe kuba acaabilo calukono lwabasalali bali mumumuni. Nguwenya Taatesu iwakatufutula kuzwa kunguzu zyamudima akutunjizya mu-Bwami bwa-Mwanaakwe uuyandwa. — Ba-Kolose 1:12, 13

**Incito 20:32**

Eno nobakwesu, ndamubika ku-Mwami, akujwi lyaluzyalolwakwe, ilikonzya kumuyaka, a-

kumupa lukono akati kabo boonse abasalazigwa.

**Ba-Kolose 3:4**

Elyo Kristo nazooboneka, oyu mbubuumi bwesu, lino anywebo muzooboneka awe mubulemu.

**Ba-Efeso 3:6, 8**

Makani ngindakayubunwidwa ngakuti bamasi babe baswaananyokwe abasizizonyina mumubili omwe abasicaabilonyina mucisyomezyo ncitusyomezegwa muli-Kristo Jesu. . . ime ndi muniini kwiinda bacece boonse babasalali, nekubaboobo ndime ndakapegwa olu luzyalo, kuti nkakambauke akati kabamasi buvubi butaambiki bwa-Kristo.

## **NDAKOMANA NKAAMBO NDIWAKO, MWAMI 35**

**Intembauzyo 40:16**

Pele boonse bakuyandaula bakondwe akusekelela mulinduwe, Boonse bayanda lufutuko lwako baambe lyoonse kuti, Jehova a-lemekwe!

**Intembauzyo 32:11**

**A m u b o t e l w e** muli-Jehova nyoonse nobalulami, Amusekelele nyoonse nemululememyoyo.

**Ba-Filipi 4:4**

Amusekelele mu-Mwami lyoonse. Ee, ndaamba lwabili eli ijwi lyakuti, Amusekelele.

**Zekariya 9:9a**

Sekelela loko, O mwana musimbi wa-Zioni. Imba cakukondwa, Omwana musimbi wa-Je-

rusalemu. Langa! Ngooyu mwami wako uuboola kulinduwe . . .

**2 Ba-Korinto 4:17**

Nkaambo mapenzi esu maubauba aakaindi kaniini alainda kutucitila bulemu bupati loko butamani.

**Luka 10:20**

Nokubaboobo mutabotelwi kuti badaimona bamumvwa, pele amubotelwe kuti mazina aanu alilembedwe kujulu.

**Intembauzyo 5:11**

Pele boonse bajene mayubilo mulinduwe basekelele, Baimbe cakukondwa mazuba oonse. Kobavuna, kuti boonse bayandisya izina lyako bakutembaule.

## 36 HENA ULUKAKILA LIMWI LUSE LWAKWE

Tusimpi 8:36

Pele kufumbwa uundibisizya walijaya mwini; Boonse bandisula balayanda lufu.

Amucenjele kuti mutamukazyi oyo uukanana. Nkaambo kuti nobatakayokoka eliya nobakali kuunduluzya kuliyooyo uwali kubaiisya ansi, ncobeni notwainda anka kutayokoka aswebo, notumufutatila oyo uuamba majwi aazwa kujulu. — Ba-Hebrayo 12:25

Luka 13:24, 25

Kamusolekesya kunjila kumulyango uusyanikide, nkaambo ndamwaambila kuti banjibanji bayooyanda kunjila, pele bayookakilwa. Mukamwini nanda abu-

ka kale ajala mulyango, anywebo mutalika kwiima anze akukonkomona, kucitendele muteeti, Omwami, tujulile, amuvuwe kuti, Nsimuzi nkomwazwida.

*Luse Ndokaka Lukozya  
Kuba Bukali*

2 Ba-Tesalonika 2:10-12

Uyooza alweeno loonse lwa-bubi lwakweena baabo abali mukunyonyooka, nkaambo tebakayanda kutambula lusinizyo lwa-kubafutula, aboobo Leza wabatumina kucita-cita kwalweeno, kuti basyome kububeji. Mbuboo-bo mbubazoobetekwa boonse abakaka kusyoma lusinizyo, abalibotezya kumakani aataluleme.

*Kuzula Cibi, Akutakatwa*  
 Oyo uumusyoma tabetekwa,  
 pele oyo uutamusyomi wabete-  
 kwa kale, nkaambo tasyomede  
 kuzina Iya-Mwana a-Leza, simu-  
 zyalwa alike. — Johane 3:18

Ba-Hebrayo 10:26, 27a

Nkaambo kuti twabisya acaali  
 muni lyakumana kutambula ku-  
 ziba kwini, takucipailwa li-  
 mbi cipaizyo cazibi, pele kwa-  
 syaala buyo kulangila kubetekwa  
 kuyoosya . . .

*Kubetekwa Ajwi*

Johane 12:48

Oyo uundikaka, akutatambula  
 majwi aangu, ulijisi uumubeteka,  
 ijwi ndendakali kwaamba, nde-

ndilyo iliti kamubeteke mubuzu-  
 ba bwakumamanino.

*Kuyandwa Alimwi*

*Akuyandaulwa*

1 Johane 4:9

Luyando Iwa-Leza Iwamulindi-  
 swe Iwakaboneka boobu, nkaa-  
 mbo Leza wakatuma Mwanaa-  
 kwe simuzyalwa-alike munyika,  
 kuti tujane buumi kumaanza aa-  
 kwe.

Ciyubunuzyo 22:17

Lino Muuya anabwiinga balaa-  
 mba kuti, Boola. Ayooyo uuswi-  
 lila alakwe aambe kuti, Boola. A-  
 yooyo uufwide nyota aboole. A-  
 muntu woonse uuyanda anywe  
 cabuyo maanzi aabuumi.

## 38 MUFUBA UYA KUKALAMBWE KAMULILO

*Tacili Cibotu Kuyokalila Mubumi  
Bwamapenzi A Satani Mukalam-  
bwe Kamulilo Kakuli Noli Kuko-  
mana Kutambiki Muli Kristo, Ka-  
mwabana Cuuno Camujulu Ku-  
kabe Kutamani!*

**Intembauzyo 53:1a**

Mufubafuba waamba mumoyo  
wakwe kuti, Taakwe Leza . . .

**Luka 11:39, 40**

Pele Mwami wakamwaambila  
kuti, Nywebo noba-Farisi, mula-  
salazya cinywido amutiba kunze,  
anu mukati mulizywide kunyanga  
abubi. Nywebo, nobafubafuba, o-  
yo uwakacita kunze engwe ngo-  
wakacita amukati na?

**Matayo 7:26, 27**

Pele umwi aumwi uuswiilila  
majwi aangu aya akutaacita u-  
zookozyanisigwa amuntu mufu-  
bafuba iwakayaka iganda yakwe  
amuse, lino yakawa mvula, milo-  
nga yakapaya, myuuwo yakau-  
nga, yakauma aganda eyo, elyo  
yakawa, nkabela buwe bwayo  
bwakakomena.

**Jeremiya 17:11**

Mbuli kwale uukumba mai  
ngaatakazyala, mbubonya obo  
mbwabede muntu uulundika bu-  
vubi muziyanza zitaluleme. U-  
yoobusia naacili akatikati kabuu-  
mi bwakwe, aboobo kumamanino  
uyooaba mufubafuba buyo.



## KALAMBWE KAMULILO MUNZI WAKULWANA 39

*Nkobaya Boonse Bakaka Mwami  
Walutangalo*

**Ba-Hebrayo 6:8**

Pele kuti insi eyo kiizyala maa-  
mvwa aciyasabavwimi, ilataka-  
twa, ili kufwaafwi kusinganizi-  
gwa, elyo kukumana ilatentwa  
buyo mulilo.

**Ba-Filipi 3:18b, 19a**

. . . nkwakulwanya aciingano  
ca-Kristo. Mamanino aabaaba  
ndunyonooko. . .

**Matayo 13:41, 42**

Mwana a-Muntu uzootuma  
baangelo bakwe kuti bazoobunge  
zintu zyoonse zyamu-Bwami bwa-  
kwe zilebya, abalo bacita zitee-

lede, nkabela bazoobasowela mu-  
bbila lyamulilo, oko kuzooba ku-  
lila akuluma ntwino.

**Ciyubunuzyo 14:11**

Lino busi bwamapenzi aabo  
bulasuka lyoonse kukabe kutama-  
ni, tabajisi lulyokezyo niluba lu-  
niini isikati amasiku, abo bako-  
mbacinyama acikozyano caco, a-  
balo boonse batambula bulembo  
bwazina lyakwe.

*Leza Ulayandisya Kucita Malele  
Kutukasya Kuya Kukalambwe  
Kamulilo. Kutuzundila Kalam-  
bwa Kamulilo Alufu Lutamani  
Alimwi Akubuka Kwabili Kute-  
gwa Tujane Kuzunda Alimwi A  
Bumi.*

## 40 MWAMI WABAMI UYOMUBIKA MUNTOLONGO SATANI MUKUYANDA KWAKWE

Ciyubunuzyo 20:1-3

Lino ndakabona angelo uuza buseluka kujulu, ulijisi cijuzyo camulindi uutagoli. Mujanza Iyakwe mwakali inketani impati nkabela wakajata Simwaaba, eyo inzoka yaciindi iitegwa Diabolosi a-Saatani, akumwaanga myaaka iili cuulu. Wakamusowela mumulindi uutagoli, wakamujalila akusinka kujulu, kuti ateeni limbi masi mane do yamana eyo myaaka iili cuulu, elyo musule Iyayaya uleelede kwaangununwa kaindi kaniini.

Ciyubunuzyo 20:7, 10

Lino myaaka iili cuulu yaaku-

mana, Saatani uyooangununwa muntolongo yakwe . . . Lino Saatani sikubeena wakasowegwa muziba Iyamulilo uuyaka asulufa, nkukonya nkucibede cinyama, alakwe musinimi mubeji nkwabede, nkabela bazoopenzegwa isikati amasiku lyoonse lyoonse kukabe kutamani.

*Kuzunda Satani Kutamani:  
Mulufutuko*

Eno mbubonya bana mbobaa-bilwa mubili abulowa, awalo mwini mbubonya wakasangana, kuti kukufwa kwakwe akamwaye oyo uujisi nguzu zyalufu, nkokuti Saatani. — Ba-Hebrayo 2:14

# SALA SUNU NGOYANDA KUBELEKELA KUKABE KUTAMANI

41

**Matayo 6:24**

Taakwe muntu uukonzya kumanina bami bobile milimo, nkaambo ulasula umwi, ulayanda umwi, na ulakakatila umwi, ula-sampaula umwi. Tamukonzyi kuba-lekela Leza antoomwe alubono.

*Hena Utobela Satani Ku-Ntologgo Na-Mwami Wabami Ku-Cuuno Calulemu Cakwe.*

**Ciyubunuzyo 21:8**

Pele bakandu abatasyomi abasesemyi abajayi abasibwaamu abalozi abakomba mituni ababeji, boonse bayoopegwa lukono lwabo muziba liyaka mulilo asulufa, ndilyonya ndolufu lwabili.

**Incito 26:18**

Kuti ukajule meso aabo, basanduke kuzwa mukusia, baye mukusalala, akuzwa mubwami bwa-Saatani kuya kuli-Leza, kuti bajane kujatilwa kwazibi alukono akati kabaabo abasalazigwa kukusyoma ndime.

**Johane 8:34-36**

Jesu wakabavuwa, Ncobeni ndamwaambila kasimpe, Muntu woose uucita cibi ngomuzike wacibi. Eno muzike takali muḡanda lyoonse, pele mwana nguukala lyoonse. Nkaambo kaako kuti Mwana wamunununa, ncobeni mulaba banunukide.

## 42 MANZI ABULEMU ALAKUNKA KUMAUU ANGU

**Johane 4:10**

Jesu wakavuwa kuti, Nowali kuzi cipegwa ca-Leza, ayoozo uu-kwaambila kuti, Ndipa nywe, na nguni, nowamukumbila nguwe, awalo naakupa maanzi aabuumi.

**Johane 7:37**

Eno kubuzuba bwakusyaalila, buzuba obo bupati bwepobwe, Jesu wakaima, wakoompolola kuti, Kwanooli muntu uufwa nyota, aze kulindime anywe.

**Ciyubunuzyo 22:1-3**

Elyo wakanditondezya mulo-nga wamaanzi aabuumi aabalan-gala mbuli krustalo, uleenda kuz-wa kucuuno ca-Leza aca-Mwa-nambelele. Mukati kamugwagwa

wawo akumabazu oonse obile kwakalimenede isamu lyabuumi, lizyala misyobo yamicelo iili ikumi aibili, lyakali kweenzya mi-celo yalyo myeezi yoonse. Nka-bela matu aasamu elyo ngaaku-ponya bantu. Takukooyooba lim-bi kusinganya, pele cuuno ca-Le-za aca-Mwanambelele ciyooba mumo, nkabela bazike bakwe ba-yoomubelekela milimo.

**Ciyubunuzyo 7:17**

Ikuti Mwanambelele uuli aka-ti kacuuno ca-Leza uyoobeembela akubasololela kutusensa twamaa-nzi aabuumi, nkabela Leza uyoo-sansamuna misozi yoonse kume-so aabo.

## **CAKAKWINDA? MUYANDAULE A MOYO OMWE 43**

**Matayo 6:33**

**Pele amusaangune kuyandaula Bwami bwa-Leza abululami bwakwe, elyo zintu ezi zyoonse mulaziyungizizigwa azyalo.**

**Deuteronomo 4:29**

**Lino nkukonya oko muyooyandaula Jehova Leza wanu, nkabela muyoomujana na mwamuyandaula camoyo woose aca muuya woose.**

**Hosea 10:12**

**Amulibyalile bululami, kuti mulitebwide luzyalo. Amulipan dile cipande canu, nkaambo casika ciindi cakuyandaula Jehova, aboole kuzoomulosezya bululami.**

**Tusimpi 8:17**

**Ndayandisya bandiyanda, A-baabo basungwaala kundiyandaula balandijana.**

**Luka 11:9**

**Aboobo ndamwaambila kuti, Amukumbile muzoopegwa, amuyandaule muzoojana, amukonkomone muzoojulilwa.**

**Isaya 55:6**

**Amuyandaule Jehova naacijanika. Amumukwiilile naacili afwiifwi.**

**Intembauzyo 86:12**

**Ndakulumba amoyo wangu woose, O Mwami Leza wangu. Njoolemeka izina lyako lyoose.**

## 44 CILALILO CAMUCADO — LEZA WAJANA BWINGA

Ciyubunuzyo 21:9b-11a, 22-24a

...Wakandaambila kuti, Boo-  
la, nkakutondezye nabwiinga,  
mwanakazi wa-Mwanambebele.  
Elyo wakanditola munguzu zya-  
Muuya kucilundu cipati cilamfu,  
wakanditondezya munzi mulemu  
Jerusalemu uza buseluka kuzwa  
kujulu kwa-Leza. Wakalijisi bu-  
lemu bwa-Leza... Lino teenda-  
kabona cikombelo mulinguwo,  
pe, nkaambo Mwami Leza Singu-  
zuzyoonse ncecikombelo cawo,  
alakwe Mwanambebele nceciko-  
mbelo. Nkabela munzi tuuyandi  
kumunikilwa izuba nuuba mwee-  
zi, nkaambo bulemu bwa-Leza  
mbobuumunikila, alimwi ilampi

lyawo ngu-Mwanambebele. Nka-  
bela bantu bamasi bayooenda  
mumumuni wawo...

Ciyubunuzyo 19:6b-9

...Aleluya! Jehova Leza wesu  
Singuzuzyoonse nguendelezuya.  
Atusekelele akukondwa, Atumu-  
pe bulemu, Nkaambo buzuba  
bwabwiinga bwa-Mwanambebele  
bwasika, Amwanakazi wakwe  
walibamba kale. Mbukubede,  
nkaambo wazumizigwa kuti asa-  
me masani mabotu aatuba buu  
aabekema. Aya masani mbubulu-  
lami bwabasalali. Lino waka-  
ndaambila kuti, Lemba obu. Bali  
acoolwe abo batambwa kupobwe  
lyabwiinga bwa-Mwanambebele.

*Kuyanda Sibwinga Lyoonse*

. . . pele amulyaabile Leza mbuli bapononona bazwa kuba-fu. . . — Ba-Roma 6:13b

Luzyalo alube kulimbabo boonse ibayanda Mwami wesu Jesu Kristo aluyando Iwinilwini.

— Ba-Efeso 6:24

*Kuzuzigwa Muuya Waluyando*

Pele oyo uubamba ijwi lyakwe, ncobeni luyando Iwa-Leza lulilondokede mulinguwe. . .

— 1 Johane 2:5a

*Omwe Anguwe*

Nkaambo tuli zizo zyamubili wakwe. — Ba-Efeso 5:30

. . . kuti mulinzizyo mube acaabilo cabu-Leza akuvunwa kubu-

sofwaazi bwaansi ano buzwa kuzisusi zibi. — 2 Petro 1:4b

Weebeka loko, O muyandwi wangu, Tojisi kampenda nikaba komwe.

— Lwiimbo Lwa-Solomoni 4:7

*Katakwe Akabala Pe*

Nkaambo kaako, nomuyandwa, mbumulangila zintu ezi, amusungwaale kujanwa mulikede muluumuno, mutakwe kabala, mutakwe kampenda mumeso aa-Leza. — 2 Petro 3:14

*Uyoba Aluyando Lutamani*

. . . amukalulangiliseye olo luzyalo ndomuyooletelwa kukuyubununwa kwa-Jesu Kristo.

— 1 Petro 1:13b

## 46 MWAMI UYOMANIZYA INYIKA YABAZANGI

Alimwi bayoolwana a-Mwanambelele, pele Mwanambelele uyoobazunda, nkaambo ngonguwe mwami wabami, ngumweendelezi wabeendelezi. Abalo balazunda mbali abo, baitidwe, basale, basyomi. — Ciyubunuzyo 17:14

Ciyubunuzyo 18:21

Mpoonya awo umwi angelo singuzu wakabweza ibbwe lili mbuli iziyo ipati, wakaliwaala mulwizi, wakati, Mbubonya obu mbuuyoocitigwa munzi mupati Babuloni. Uyoowisigwa bbu, tuukooyoojanwa limbi pe.

2 Ba-Tesalonika 2:8

Elyo nayooyubununwa sikusotoka milao, ngwayoonyonyoona

Mwami Jesu a-Muuya wamulomo wakwe, akumulobya akulibonya kwakuboola kwakwe.

Zekariya 14:12

Nkabela nceeci cuumo Jehova ncati umye bantu boonse beza kukulwisya Jerusalemu. Uyoobozeka nyama yabo nibaciimvwi amaulu aabo, aalo meso aabo ayoobola mumakomba aao, azyalo indimi zyabo ziyoobola mukanwa lyabo.

1 Ba-Korinto 15:24

Ndilyonya naayooba mamani-no, nayootambika bwami kumanza aa-Leza wisi, nayoolobesezya boonse beendelezi abami abasimutwe.



## **CUULU CAMYAKA YAKUKOMANA YAKULELA 47 ANYIKA ANO**

**Ciyubunuzyo 11:15b**

. . . Bwami bwaansi bwaba bwa-Mwami wesu abwa-Kristo wakwe, nkabela uyooendelezya lyoonse mane kukabe kutamani.

**Ciyubunuzyo 5:9b, 10**

. . . Nkaambo nduwe wakaya-swa akutufutula kuli-Leza abulowa bwako, Swebo to bantu bamisyobo yoonse amilaka yoonse amikowa yoonse, azisi zyoonse, Akutubika mbuli bami abapaizi ba-Leza wesu, Nkabela tuyooendelezya ansi.

**Ciyubunuzyo 20:4b**

. . . alimwi ndakabona myuuya yabaabo ibakakosolwa mitwe

nkaambo kabumboni bwa-Jesu amakani aa-Leza, abaabo ibatakali kukomba cinyama acikozyano caco akutatambula bulembo bwaco ankumu zyabo nimuba mu maanza aabo. Aba bantu bakapona akweendelezya antoomwe a-Kristo myaaka iili cuulu.

**Ciyubunuzyo 20:6**

Uli acoolwe, alimwi ulasalala, kufumbwa muntu uubuka mububuke obu butaanzi. Kuli baabo bali boobo lufu lwabili talukwe inguzu, pele bayooba bapaizi ba-Leza aba-Kristo, bayooendelezya awe myaaka iili cuulu.

Intembauzyo 145:1

Njookutembaula, O Leza Mwami wangu; Njoolumba izina lyako lyoonse alyoonse.

Johane 17:24a

Taata ndiyanda kuti abo mbookandipa babe antoomwe amebo nkwembede, kuti babone bulemu bwangu mbookandipa. . .

Ciyubunuzyo 21:3b, 4

. . . Amubone, bukalo bwa-Leza mpobuli akati kabantu, uzookala akati kabo. Bazooba bantu bakwe, alakwe Leza mwini uzookala kulimbabo, azoobe Leza wabo. Nkabela uyoosindula misozi yoonse kumeso aabo, takukooyooba limbi lufu, nikuba kuomo-

ka nikuba kulila nikuba kuciswa, nkaambo zintu zyakale zyamaninina.

1 Ba-Tesalonika 4:16c, 17

. . . nkabela nobayoosaanguna kubuka abafwide muli-Kristo. Elyo swebo tobaumi tobasyaalizi tuyoobwezelwa mumakumbi antoomwe ambabo, tukacingane a-Mwami mujulu aboobo tuyookala a-Mwami lyoonse.

Takukooyooba limbi masiku, aboobo tabayandi kumunikilwa ilampi nuuba mumuni wazuba, nkaambo Mwami Leza nguuyoo-bamunikila, nkabela bayooendelezya lyoonse alyoonse kukabe kutamani. — Ciyubunuzyo 22:5

## **KRISTO ULAMBA**

**“Oyo uuzunda njoomuzuminina kukala ambe acuuno cangu, mbubonya mbuli mbundakazunda ambebo, aboobo sunu ndikedede a-Taata acuuno cakwe.”**

**—Ciyubunuzyo 3:21**

**Muli Kristo Ndacitilwa Zipati  
Ululeme Ulandita Alimwi Ndelede Kuyinka  
Kuya Kukuzunda!**

**Pele tulalumba Leza ikuti ulatupa luzundo kunguzu zya-Mwami wesu Jesu Kristo. Mbubo, bakwesu bayandika, amukakatile, mutazungani. Amupangike myoyo yanu lyoonse kumilimo ya-Mwami, nkaambo mulizi kuti milimo yanu yamu-Mwami tiikonzyi kuba yabuyo pe.**

**—1 Ba-Korinto 15:57, 58**

Published in numerous languages by World Missionary Press as God supplies funds in answer to prayer. If you would like more copies for careful distribution, write in English to:

**World Missionary Press, Inc.**  
**P.O. Box 120**  
**New Paris, IN 46553-0120 USA**

Scripture text reprinted from the Bible in Tonga by permission of the United Bible Societies Africa Regional Centre, Nairobi, Kenya.